

傷寒論廣訓

辨霍亂病脈證并治

霍亂篇通解

病名霍亂。所以列於厥陰篇之後者。即靈樞經脈篇云。厥氣上逆。則霍亂是也。後田氏削去此篇。未免稍誤。然其中猶有精義可尋者。不得不詳爲註釋。蓋先天後天。仲師往往互論。以先天爲生化之本。後天爲滋養之源。故耳。況司天在泉。氣以太陽太陰爲對待。寒濕相感。理勢然也。此篇乃太陽之府。感受寒邪。由先天而直犯後天。故嘔吐下利。卒然而作。即靈樞五亂篇云。亂於腸胃。則爲霍亂。是也。所以名爲霍亂者。霍字從雨。從佳。有鳥上飛而雨下降之象。乃水火變亂於中。現證蓋寒邪不從高表而入。直從下部干太陽之府。故有此變耳。何以知之。觀後節言脈則屢舉微象。用方則首取四逆。繼用五苓理中等劑。可瞭然明了矣。

問曰。病有霍亂者何。答曰。嘔吐而利。名曰霍亂。

合下四節言霍亂病有兼證變證之不同也。

成無已曰。三焦者水穀之道路。邪在上焦。則吐而不利。邪在下焦。則利而不吐。邪在中



焦。則既吐且利。以飲食不節。寒熱不調。清濁相干。陰陽乖隔。遂成霍亂。

張隱菴曰。夫以霍亂接於六篇之後者。霍亂爲病。從內而外。以證傷寒從外而內也。霍亂者。揮霍撩亂。由邪實於胃。脾氣內虛。轉輸不力。以致嘔吐而利。一時並發。是名霍亂。陳修園曰。中土爲萬物之所歸。邪傷中土。邪氣與水穀之氣。一時交亂。故上嘔吐而下利。邪正紛爭。倉忙錯亂。名曰霍亂。

按此節乃霍亂病之提綱也。寒邪從下入中。直犯太陰陽明。故嘔吐下利。卒然齊作也。問曰。病發熱。頭痛。身疼。惡寒。吐利者。此屬何病。答曰。此名霍亂。自吐下。又利止。復更發熱也。

成無己曰。發熱頭痛。身疼惡寒者。本是傷寒。因邪入裏。傷於脾胃。上吐下利。令爲霍亂。利止裏和。復更發熱者。還是傷寒。必汗出而解。

張隱菴曰。上文但言嘔吐而利。是名霍亂。此言寒邪在表。而兼吐利之霍亂也。發熱頭痛。身疼惡寒。是爲寒邪在表。復兼吐利。故此名爲霍亂。霍亂自吐下者。未有名爲霍亂。而不吐下也。又利止復更發熱者。言發熱頭痛。身疼惡寒。吐利。乃一時並發。又有利止復更發熱。如下文所謂本是霍亂。今是傷寒者。是也。

程應旂曰。霍亂之證。僅見嘔吐而利。誰不知貴重中焦者。若病有發熱頭痛。身疼惡痛。夾此吐利從來。表裏之間。倉卒難辨。故從實定名。破去傷寒之稱。亦名曰霍亂。

吳謙曰。此承上條。以詳出其證也。頭痛身疼。發熱惡寒。在表之風寒暑熱爲病也。嘔吐瀉利。在裏之飲食生冷爲病也。具此證者。名曰霍亂。若自嘔吐已。又瀉利止。仍有頭痛身疼惡寒。更復發熱。是裏解而表不解也。宜用藿香正氣湯。或香薷飲。散而和之。可也。若不頭痛身疼。惡寒吐瀉。汗發出熱。渴而引飲。是表解而裏未解也。宜辰砂六一散。或白虎加人參湯。補而清之可也。

按此節乃表裏兼證之霍亂也。寒邪直從下入。自然牽動中宮。亦有兼病。經氣者。故仲師復詳論以示後學也。凡病至吐利。中氣受傷。當以和中爲重。此證則吐利雖止。復更發熱。又當於和中之內。兼解表邪。斯中外皆安也。

傷寒。其脈微澀者。本是霍亂。今是傷寒。却四五日。至陰經上。轉入陰。必利。本嘔下利者。不可治也。欲似大便。而反矢氣。乃不利者。屬陽明也。便必鞭。十三日愈。所以然者。經盡故也。

成無己曰。微爲亡陽。澀爲亡血。傷寒脈微澀。則本是霍亂。吐利亡陽亡血。吐利止。傷寒

之邪未已。還是傷寒。却四五日。邪傳陰經之時。裏虛遇邪。必作自利。本嘔者邪甚於上。又利者邪甚於下。先霍亂裏氣太虛。又傷寒之邪。再傳爲吐利。是重虛也。故爲不治。若欲似大便。而反矢氣。仍不利者。利爲虛。不利爲實。欲大便而反矢氣。裏氣熱也。此屬陽明。便必鞭也。十三日愈者。傷寒六日。傳遍三陰三陽。後六日再傳經盡。則陰陽之氣和。火邪之氣去。而愈也。

張隱菴曰。此承上文。利止復更發熱之意。言先霍亂後傷寒。邪入於陰。則不可治病。在陽明爲欲愈也。傷寒其脈微瀯。主精血內虛。本是霍亂者。本於吐利也。今是傷寒者。利止而更復發熱也。却四五日。至陰經上。轉入陰者。四日至太陰。五日而入於少陰也。邪入於陰。故必下利。夫陰寒下利。急當救裏。若先本霍亂之嘔吐下利。後入陰復利者。裏氣先虛。爲不可治。欲似大便。而反有矢氣。仍不利者。此屬陽明便鞭。不同陰寒下利。故十三日愈。又申言所以得愈者。經盡而來復於太陽故也。

吳謙曰。此承上條。辨發熱頭痛。身疼惡寒。吐利等證。爲類傷寒之義也。若有前證。而脈浮緊。是傷寒也。今脈微瀯。本是霍亂也。然霍亂初病。卽有吐利。傷寒吐利。却在四五日後。邪傳入陰經之時。始吐利也。此本是霍亂之卽嘔吐。卽下利。故不可作傷寒治之。俟

之自止也。若止後欲似大便。而去矢氣。仍不大便。此屬陽明也。然屬陽明者。大便必鞭。雖大便鞭。乃傷津液之鞭。未可下也。當俟至十三日經盡。胃和津回。便利自可愈矣。若過十三日。大便不利。爲之過經不解。下之可也。

陳修園曰。傷寒。其脈因吐利後。氣虛而微。因吐利後。血虛而澁者。其吐利本是霍亂。今更發熱。又是傷寒。却至四日太陰。五日少陰。至陰經主氣之上。或轉入於藏陰。則藏陰受邪。必復下利。何則。此證本由霍亂。嘔吐下利而得者。今若下利。是爲重虛。不可治也。若利止發熱。至四五日。而病人欲似大便。而反矢氣。仍不利者。爲不入於陰。而仍屬陽明也。屬陽明。則燥氣在上也。便必硬。十三日經氣兩週。自愈。所以然者。以行其經盡故也。

按此節乃霍亂轉傷寒之證也。提曰傷寒者。必有發熱惡寒身疼之表證。但脈不浮緊。而反見微濇者。蓋因本是霍亂。今是傷寒故也。所以然者。既已嘔吐下利。則腸胃之津液受傷。故氣虛而脈必微。血虛而脈必濇。所由來也。却四五日至陰經上者。却訓後言。後四五日。當太陰少陰主氣之期也。若治不得法。使陽邪陷陰。則必復作下利。設本來之嘔證未除。而今又見下利。切不可作三陽之合病下利治也。若似大便。而反矢氣。仍

不利者。是治得其法。邪入陽明而化燥熱也。便必鞭。十三日愈者。先後天皆受邪。本氣內虛。必待經氣三週。回復太陽。乃能全愈。所以然者。寒傷高表。經氣一週。即可回復。此寒由下部而來。從先天而及後天。必經氣三週。乃爲經盡也。

下利後。當便鞭。鞭則能食者愈。今反不能食。到後經中。頗能食。復過一經。能食。過之一日。當愈不愈者。不屬陽明也。

成無已曰。下利後。亡津液。當便鞭。能食爲胃和。必自愈。不能食者。爲未和。到後經中。爲復過一經。言七日後再經也。頗能食者。胃氣方和。過一日當愈不愈者。暴熱使之能食。非陽明氣和也。

張隱菴曰。此承上文陽明便鞭之意。言人以胃氣爲本。能食則愈。不必專屬陽明也。下利後。當便鞭。承上文便鞭而言也。人以胃氣爲本。故便鞭而能食者愈。今反不能食。病當未愈。到後經中。頗能食者。七日至十三日。藏府經氣調和。故頗能食也。復過一經。能食者。至十三日。而亦能食也。過之一日。當陽明主氣之期。故當愈而不愈於此日者。穀入於胃。諸經皆以受氣。能食則諸經氣脈自和。而不專屬陽明也。

吳謙曰。此申上條。下利後便必鞭之義也。凡下利後。腸胃空虛。津液匱乏。當大便鞭。鞭

則能食者。是爲胃氣復。至十三日津回便利。自當愈也。今反不能食。是胃氣未復。俟到十三日後。過經之日。若頗能食。亦當愈也。如其不愈。是爲當愈不愈也。當愈不愈者。則可知不屬十三日過經便鞭之陽明。當屬吐利後。胃中虛寒。不食之陽明。或屬吐利後。胃中虛燥之陽明也。此則非藥不可。俟之終不能自愈也。理中脾約。擇用可矣。按此節乃霍亂後。有屬陽明。不屬陽明之辨也。上節轉傷寒。是屬太陽。故當和中以達表。其結果仍還陽明。乃愈。蓋霍亂是太陰土病。從陰出陽。必得陽明胃利。而中土乃能安定也。此節承上節而來。曰下利後。當便鞭。鞭則能食者愈。卽以便鞭能食。爲霍亂後一定之佳兆也。若但見便鞭而反不能食。到後經中頗能食。復過一經能食者。是便鞭爲下部陽虛之寒結。非陽明之燥結也。故有初不能食。到後經中頗能食之現象。所以然者。陽氣衰微。胃氣必由漸而復。頗能食者。少能食也。復過一經能食者。是經氣三週。陽始旺也。過之一日。當愈而不愈者。卽十三日後之一日。爲陽明主氣之期。或但能食而便反溏。故曰不屬陽明也。既不屬陽明。則是濕未化。燥寒未化。熱仍當溫。補脾腎。惡寒脈微而復利。利止亡血也。四逆加人參湯主之。

自此以下。凡七節。言霍亂有種種變證。治法亦有種種之不同也。

成無己曰。惡寒脈微而利者。陽虛陰勝也。利止則津液內竭。故云亡血。金匱玉函云。水竭則無血。與四逆湯。溫經助陽。加人參生津液益血。

張隱菴曰。此承上文。轉入陰必利之意。言虛寒復利而亡血也。惡寒脈微者。今是傷寒而轉少陰也。復利者。本是霍亂。則已利而今復利也。夫本嘔下利。為不可治。今利雖止而亦亡血也。故更以四逆加人參湯主之。

按此節乃霍亂後亡血之證也。凡惡寒證。多屬陽虛。惡寒而在吐利之後。尤為陽虛無疑。况加以脈微而復利乎。既是陽虛。何又名為亡血。蓋以服溫藥扶陽利雖止而脈仍不去。或不能食。故也。何以知之。少陰篇中。通脈四逆湯後。有利止脈不出者。加人參二兩。即是此節之確據。血熱乃能思食。詳厥陰篇。傷寒五六日。不結胸節。彼節亦是亡血。參玩便知。

霍亂。頭痛發熱。身疼痛。熱多。欲飲水者。五苓散主之。寒多。不用水者。理中丸主之。

理中丸方

人參

甘草

白朮

乾薑

各三兩

右四味。搗篩為末。蜜和丸。如雞黃大。以沸湯數合。和一丸。研碎。溫服之。日三



服。夜二服。腹中未熱。益至三四丸。然不及湯。湯法以四物依兩數切。用水八升。煮取三升。去滓。溫服一升。三日服。若臍上築者。腎氣動也。去朮。加桂四兩。吐多者。去朮。加生薑三兩。下多者。還用朮。悸者。加茯苓二兩。渴欲得水者。加朮。足前成四兩半。腹中痛者。加人參。足前成四兩半。寒者。加乾薑。足前成四兩半。腹滿者。去朮。加附子一枚。服湯後。如食頃。飲熱粥一升許。微自溫。勿發揭衣被。

成無己曰。頭痛發熱。則邪自風寒而來。中焦爲寒熱相半之分。邪稍高者居陽分。則爲熱。熱多欲飲水者。與五苓散散之。邪稍下者居陰分。則爲寒。寒多不用水者。與理中丸溫之。經曰。脾欲緩。急食甘以緩之。用甘補之。人參白朮甘草之甘。以緩脾氣。調中寒淫所勝。平以辛熱。乾薑之辛。以溫胃散寒。脾虛。腎氣動者。臍上築動。經曰。甘者令人中滿。朮甘壅補。桂泄奔豚。是相易也。嘔家不喜甘。故去朮。嘔多服生薑。以辛散之。下多者。用朮以去濕。悸加茯苓以導氣。津液不足則渴。朮甘以緩之。裏虛則痛。加人參以補之。寒淫所勝。平以辛熱。胃虛則氣壅。腹滿。甘令人中滿。是去朮也。附子之辛。以補陽散壅。方有執曰。霍亂熱多。欲飲水者。陽邪盛也。寒多。不用水者。陰邪盛也。五苓散者。水行則

熱瀉。是宜兩解。理治也。中裏也。參朮之甘。溫裏也。甘草甘平。和中也。乾薑辛熱。散寒也。吳謙曰。霍亂者。水飲內發。故吐瀉交作。風寒外襲。故頭痛發熱。身疼痛也。熱多。欲飲水者。是飲熱。主五苓散。以兩解其飲熱。若不欲飲水者。是中寒。主理中丸。以溫中。按此節。乃霍亂有熱多寒多之辨也。寒熱二字。最宜着眼。仲師從欲飲水。不用水。認出大有深意。蓋太陽乘寒。水之氣。膀胱之標。陽盛。則通身發熱。水津不能上升。而發渴。此責在太陽。之標。陽太過。故用五苓散。以化氣行水。而治之。若誤認爲大渴飲水。之陽明證。則差矣。雖曰熱多。而仍不離朮桂。豈得以純熱證目之。若膀胱之本寒盛。則寒與濕合。而爲不用水之太陰證。又當用理中。以治之。方名理中。而不名溫中者。以此方能分理中宮。水火交亂之邪。故也。亦不是純寒證。若是純寒。則人參尚可。用乎。觀方後寒多加乾薑。腹滿去朮。加附子。則可知寒多者。腹必滿。熱多者。必小便不利。此又仲師言外之旨。學者當所體會。而得之也。尤可異者。此節首提出頭痛發熱。身疼痛等表證。而却不用表藥。是何故耶。蓋霍亂。以裏證爲重。卽傷寒急當救裏。用四逆之意也。觀下節續出救表之法。卽可知救裏救表之有急緩也。

吐利止而身痛不休者。當消息和解其外。宜桂枝湯小和之。

成無已曰。吐利止。裏和也。身痛不休。表未解也。與桂枝湯。小和之。外台云。裏和表病。汗之則愈。

方有執曰。吐利止。裏和也。身痛。表退而新虛。消息。猶言斟酌也。桂枝湯。固衛以和表也。小和。言少少與服。不令過度之意也。

張隱菴曰。此承上文霍亂傷寒之意。而言吐利止。則霍亂已愈。身痛不休。則寒邪未盡。故當消息和解其外。宜桂枝湯。小和之。曰少和者。大邪已去。而病輕微也。

按此節乃霍亂後裏和而表未和之證也。緊承上節而來。救裏之後。又當救表。曰吐利止。而身痛不休者。當消息和解其外。諸註已詳。惟消息二字。尚未解釋。真確。蓋消訓滅。息訓生。即助正除邪。使正氣漸生。邪氣漸滅之意也。小和二字。方註已明。茲不贅。

吐利汗出發熱惡寒四肢拘急手足厥冷者四逆湯主之

成無已曰。上吐下利。裏虛汗出。發熱惡寒。表未解也。四肢拘急。手足厥冷。陽虛陰勝也。與四逆湯助陽退陰。

張隱菴曰。合下兩節。言四逆湯。啓下焦之生陽。而治中焦之吐利也。吐利汗出。乃中焦津液外洩。發熱惡寒。表氣虛也。四肢拘急。津液竭也。手足厥冷者。生陽之氣不達於四

肢。故主四逆湯。啓下焦之生陽。溫中焦之土氣。

程知曰。吐利而復汗出。陽氣幾於走失矣。發熱惡寒。爲陽未盡亡。四肢拘急。手足厥冷。不得不用四逆。以助陽退陰。按少陰證云。惡寒。身踰而利。手足厥冷者。不治。又云。下利。惡寒而踰臥。手足溫者。可治。此云吐利汗出。四肢拘急。手足厥冷。而用四逆者。以有發熱一證也。發熱爲陽未盡亡。猶是病人生機。故經又曰。吐利。手足不逆冷。發熱者不死。陳修園曰。霍亂之爲陰虛者。中焦之津液。內灌溉於藏府。外濡養於筋脈。吐利。則津液亡於上下矣。汗出。則津液於外矣。亡於外則表虛。而發熱惡寒。亡於上下。無以榮筋脈。而四肢拘急。陰陽不相順接。而手足厥冷。以四逆湯主之。助陽氣以生陰液。方中倍用炙甘草。以味補陰。

按此節乃霍亂病。太陽標陽未亡之證也。提曰。吐利汗出者。謂寒邪直犯中宮。由吐利而復汗出。大有亡陽之象。所幸者。發熱惡寒一證。太陽之標陽未去。故尙可挽救也。四肢拘急者。以肝主身之筋膜。脾主身之肌肉。乃寒傷肝脾之陽氣。故筋膜爲之拘攣。肌肉爲之緊急也。所以發現於四肢者。四肢爲諸陽之本。又脾主四肢故也。手足厥冷者。乃陰陽氣不相順接也。主以四逆湯者。大溫脾腎而去寒邪。斯諸證自愈矣。

既吐且利。小便復利。而大汗出。下利清穀。內寒外熱。脈微欲絕者。四逆湯主之。
成無已曰。吐利亡津液。則小便當少。小便復利。而大汗出。津液不禁。陽氣大虛也。脈微
爲亡陽。若無外熱。但內寒下利清穀。爲純陰。此以外熱。爲陽未絕。猶可與四逆湯救之。
張隱菴曰。吐且利。小便復利。則津液下洩。大汗出。則津液外亡。下利清穀者。少陰病也。
內寒外熱者。少陰病也。內寒外熱者。內真寒而外假熱也。脈絕微欲。則生陽不升。故亦
主四逆湯。啓少陰之生陽。和中焦之土氣。
吳謙曰。霍亂之爲病。既吐且利。津液內亡。小便當少。而無汗。今小便復利。而大汗出。下
利清穀。脈微欲絕者。是外之陽虛。不能固護。內之陰寒。獨盛於中。內真寒而外假熱也。
故不用理中。而以四逆主之也。

陳修園曰。霍亂之爲陽虛者。既吐且利。陽氣亡於上下矣。小便復利。而大汗出。陽氣亡
於表裏矣。下利清穀。裏寒甚也。寒甚於內。而格陽於外。故內寒外熱。診其脈微而欲絕
者。惟陰無陽。生陽不升故也。宜急回陽。以四逆湯主之。

按此節乃霍亂病。陽明外陽未亡之證也。緊承上節而來。上節但言汗出。而不言大汗。
又不言小便自利。可知太陽之標陽未亡也。此節則不但汗出。並且大汗。且小便自利。

是太陽之標、陽已亡。所幸者。雖下利清穀。而內寒外熱。陽明之外、陽未去。尤有一線生機。故主四逆。以啓生陽。而溫中土。此節可與少陰篇中。少陰病。下利清穀。裏寒外熱。一節對勘。更爲明晰。湯方宜是通脈四逆。何以知之。本論脈欲微絕之證。凡三見。二節皆用通脈四逆。此節何獨不然。況霍亂篇中。無重方。此節病既重於上。節安得復用四逆耶。脈微欲絕者。是心火大虛。脈中之陽氣亦微。故重用薑草。以復心家之陽也。

吐已下斷。汗出而厥。四肢拘急不解。脈微欲絕者。通脈四逆。加豬膽汁湯主之。
四逆加豬膽汁湯方。於四逆湯方內。加豬膽汁半合。餘依前法服。如無

豬膽。以羊膽代之。

成無已曰。吐已下斷。則津液內竭。則不當汗出。汗出者不當厥。今汗出而厥。四肢拘急不解。脈微欲絕者。陽氣太虛。陰氣正勝也。若純以陽藥。恐陰爲格拒。或嘔或躁。不得復入也。與通脈四逆湯。加豬膽汁。膽苦入心。而通脈。膽寒補肝。而和陰。引置湯藥。不被格拒。內經曰。微者逆之。甚者從之。此之謂也。

張隱菴曰。重言以結上文兩節之意。兩節皆主四逆湯。此言氣血皆虛。更宜通脈四逆。豬膽人尿以治之。不曰吐利止。而曰吐已下斷者。津液兩竭。吐無所吐。下無所下也。若

吐已下斷。如所謂汗出而厥。四肢拘急之證。仍然不解。所謂脈微欲絕之脈。依然如故。此爲陰陽血氣俱虛。更宜通脈四逆。加豬膽汁湯主之。通脈四逆湯。解見少陰篇。加水畜之甲膽。乃起腎藏之精汁。上資心主之血。更加人尿。乃引膀胱之津液。還之胃中。取津液內滋而血氣調和之意。

高士宗曰。霍亂之證。至汗出而厥。四肢拘急。脈微欲絕。乃惟陰無陽。用四逆湯。不必言矣。又加豬膽汁人尿者。津液竭而陰血并虛。不當但助其陽。更當滋益其陰之意。每見夏月霍亂之證。四肢厥逆。脈微欲絕。投以理中四逆。不能取效。反以明礬少許。和涼水服之。而卽愈。亦卽膽汁人尿之意。先賢之法。可謂週遍詳明矣。

陳元蔚曰。按論云吐已下斷者。言陰陽氣血俱虛。水穀俱竭。無有可吐。而自已。無有可下。而自斷也。曰汗出而厥。脈微欲絕者。無陽氣以主之也。曰四肢拘急者。無津液以養之也。此際若用四逆湯薑附之溫。未嘗不可以回陽。倍用甘草之甘。未嘗不可以滋陰。然猶恐其緩而無濟也。若用通脈四逆湯。倍乾薑之勇。似可追反元陽。然猶恐大吐大利之餘。驟投大辛之味。內而津液愈涸。外而經脈愈攣。頃刻死矣。師於萬死中不見一生路。取通脈四逆湯。以回其厥。以止其汗。更佐以豬膽生調。取其苦先入心。而脈復。以


汁補中焦之汁。灌漑於筋。則拘急解。辛甘與苦甘濟。斯陰陽二氣。頃刻調和。即四逆加人參湯之意。但人參亦無情之草根。不如猪膽汁之異類有情。生調得其生氣。為效倍神也。諸家囿於白通加法。謂格陽不入。借苦寒以從治之。堪發一笑。按古本只加膽汁。無人尿。張隱菴註有人尿。必有所本。讀其注文。極有見解。

按此節乃霍亂病。少陽膽汁被劫之證也。提曰。吐已下斷者。言腸胃之津液已竭。吐下而劫出膽汁也。汗出而厥者。言心陽衰而汗出。肝陽亦因之而虛。故汗出而即發厥也。四肢拘急不解者。言服四逆諸劑而拘急仍然不解也。所以然者。陽氣雖虛。而陰液亦亡也。故必於通脈四逆湯中。加猪膽汁一味。藉異類有情之物。以益有形之陰液。斯陰陽和而拘急自愈矣。

吐利發汗。脈平小煩者。以新虛不勝穀氣故也。

成無己曰。內經云。食入於陰。長氣於陽。新虛不勝穀氣。是生小煩。

張隱菴曰。此言邪從外解。穀氣內行。為胃和欲愈之證。以終霍亂之義。吐利發汗。言病吐利而胃不虛。故發汗以解之。脈平小煩者。吐利發汗。經脈方虛。不勝胃中所食之穀。氣故脈平而小煩也。經云。穀入於胃。脈道乃行。又云。食氣入胃。濁氣歸心。淫精於脈。新



虛不勝。此之謂也。

鄭重光曰。吐利發汗。脈平。陰退陽回。乃有此象。猶以新虛不勝穀氣。而致小煩。蓋霍亂吐利。晬時不可便與飲食。以胃氣逆反。倉廩未固。不可便置米穀耳。

莫氏曰。吐利發汗。脈平小煩。如未與穀。何以云新虛不勝穀氣。意謂吐利之發汗。必得永穀之精。而後汗出。溱溱。經云。得穀者昌。失穀者亡。治霍亂者。慎勿徒損其胃氣也。按此節。乃霍亂愈後。新虛不勝穀氣之證也。結此一條。示人知節食。即所以養脾。曰吐利發汗。脈平小煩者。謂吐利發汗。是表裏俱傷。脈平如常。則表裏和而病愈矣。若不時小煩者。以新虛之人。求救於穀。必饑而貪食。不覺過多。故有此現證。素問刺志論云。穀入多而氣少者。得之有所脫血。濕居下也。此證既經吐利。而又發汗。非血脫而何。血液既傷。則火力微。而濕轉盛。故火鬱而小有煩耳。即經云。食入於陰。長氣於陽。俟陽旺而煩目解矣。故曰。新虛不勝穀氣。不勝者。不勝其陰也。